



CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA DA XUNTA DE GALICIA E A FUNDACIÓN GALICIA OBRA SOCIAL PARA A REALIZACIÓN DA XIV EDICIÓN DO PREMIO DE POESÍA AFUNDACIÓN

En Santiago de Compostela, 20 de maio de 2016.

REÚNENSE

Dunha parte a Consellería de Cultura, Educación e Ordenación Universitaria (en adiante, “a Consellería”) e no seu nome e representación _____, en virtude do seu cargo de conselleiro de Cultura, Educación e Ordenación Universitaria para o que foi nomeado polo Decreto 15/2015, do 9 de febreiro de 2015, no exercicios das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia e o artigo 2 da Resolución do 8 de abril de 1991, pola que se publica o acordo do Consello da Xunta de Galicia do 27 de marzo de 1991.

Doutra a Fundación Galicia Obra Social (en adiante, “Afundación”) inscrita no Rexistro de Fundacións de Interese Galego, Sección da Consellería de Facenda, co 2013/12, N.I.F. G 70.270.293; e no seu nome e representación, _____, con D.N.I. número _____, en virtude da súa condición de xerente e apoderado consonte a, entre outros, o acordo adoptado polo Padroado de Afundación o 2 de setembro de 2014, elevado a público ante o Notario de A Coruña, D. Isidoro Calvo Vidal, o 5 de setembro de 2014, protocolo 690. "

Ambas as dúas partes interveñen en función dos seus respectivos cargos e no exercicio das súas facultades que para convir no nome das Entidades que representan teñen conferidas e,

MANIFESTAN



PRIMEIRO.- Que a Consellería de Cultura, Educación e Ordenación Universitaria é o órgano da Administración da Comunidade Autónoma ao que lle corresponden as competencias en materia de creación e difusión cultural. Dentro dese ámbito de actuacións vén desenvolvendo unha serie de actuacións encamiñadas á divulgación, promoción da cultura, do libro e da lectura para achegar o máis posible o noso patrimonio cultural á sociedade en xeral.

SEGUNDO.- Que a Consellería, a través da Secretaría Xeral de Cultura, e Afundación consideran esencial o establecemento de accións conxuntas que permitan desenvolver un programa para a realización dunha serie de actividades para alentar a creación poética e afianzar o sistema literario en galego, como a celebración da XIV edición do Premio de Poesía Afundación.

TERCEIRO.- Que as asociacións e demais entidades culturais sen ánimo de lucro levan a acabo unha importante actividade cultural que contribúe ao desenvolvemento, mellora e difusión da nosa cultura, tanto na propia comunidade como cara ao exterior.

Que Afundación leva a cabo un importante labor social co obxectivo, entre outros, de contribuír co desenvolvemento da cultura galega en xeral e do sistema literario galego en particular, a través de iniciativas como o Premio de Poesía Afundación, que organiza co apoio do Centro PEN de Galicia.

CUARTO.- De acordo coa planificación estratéxica realizada pola Secretaría Xeral de Cultura, para o ano 2016, e dada a especificidade e exclusividade das actividades a realizar baseadas en criterios obxectivos, a sinatura deste convenio encádrase dentro dos previstos neste plan, nos que non é posible promover a concorrência, polas especiais características da entidade coa que se convenia.

QUINTO.- Con este convenio asegúrase a realización de diversas manifestacións da cultura galega levadas a cabo por entidades culturais, afondando en novas vías de colaboración que facilitan a actividade dos artistas galegos e tamén daqueles asentados en Galicia, e que contribúan a achegarlle á sociedade o seu traballo creativo.



Por isto, para acadar unha maior eficacia na execución de actuacións, dado o interese común das partes asinantes nas que teñen intereses coincidentes, é polo que asinan o presente convenio de colaboración de acordo coas seguintes,

CLÁUSULAS

PRIMEIRA.- OBXECTO

A través do presente convenio establécense as condicións polas que se rexerá a colaboración entre a Consellería e Afundación, para desenvolver un programa conxunto encamiñado á realización dunha nova edición do Premio de Poesía Afundación, co desexo de alentar a creación poética en galego e de contribuír, deste xeito, a afianzar o sistema literario na lingua propia de Galicia.

O Premio ten entre os seus obxectivos a promoción e difusión da creación literaria en lingua galega, en particular da poesía.

A colaboración da Consellería, a través da Secretaría Xeral de Cultura, é para as seguintes actuacións relacionadas co desenvolvemento do premio:

- Na constitución do xurado do Premio, que se comporá por persoeiros de recoñecido prestixio no ámbito literario e cultural.
- Na prestación de apoio institucional na organización das actividades que teñan relación co certame, así como na súa entrega.
- Na difusión do premio mediante actuacións informativas e divulgativas, roldas de prensa, e nas páxinas web da Consellería de Cultura e Educación, e da Secretaría Xeral de Cultura.
- En calquera outra que as partes acordasen expresamente.

As bases e as condicións de participación da convocatoria do premio figuran como Anexo I e forman parte integrante deste convenio de colaboración.



SEGUNDA.- RESPONSABILIDADE DO PROXECTO

Todas estas actuacións, serán organizadas por un equipo de profesionais e dirixidos por Afundación, baixo as ordes de D. Pedro Otero Espinar que actuará como interlocutor fronte á Consellería.

Afundación designará ao persoal máis axeitado para a constitución do equipo que organizará, xestionará e executará todas as actividades que teñan relación co premio, tales como elaboración das bases, convocatorias, circulares, documentación, constitución do xurado, organización dos actos de presentación e de entrega do premio, facilitándolle as infraestruturas e os medios necesarios ao persoal que interveña nestas tarefas.

TERCEIRA.- SEGUIMIENTO DAS ACTIVIDADES

A Consellería nomeará un interlocutor da Secretaría Xeral de Cultura responsable de prestar asesoramento técnico e do seguimento das actividades contempladas neste convenio.

CUARTA.- ESTABLECEMENTO DUNHA COMISIÓN MIXTA DE SEGUIMIENTO

Para o bo desenvolvemento das actividades obxecto do convenio establecerase unha Comisión Mixta, integrada por representantes de cada unha das institucións á que corresponderá o seguimento, interpretación e avaliación das accións derivadas do presente convenio.

Por parte da Consellería actuará como representante o secretario xeral de Cultura ou a persoa en quen delegue.

Por parte de Afundación actuará como responsable desta comisión o xerente de Afundación ou a persoa que designe en substitución.

QUINTA.- FINANCIAMENTO

Para a realización conxunta das actividades, o importe total ascende a dez mil euros (10.000 €).

A Consellería contribuirá no desenvolvemento das actividades previstas neste convenio coa achega de 5.000,00 €, (IVE incluído), para o que existe crédito axeitado e suficiente na partida orzamentaria 10.20.432A.640.2 dos orzamentos xerais da Comunidade Autónoma de Galicia para o ano 2016.



A dita achega só cubrirá o custo para o desenvolvemento do premio, sen que Afundación poida obter beneficio ningún polo mesmo.

A entidade Afundación achegará medios materiais, recursos humanos e técnicos precisos para a realización das actividades e financiará gasto por importe de 5.000 € (IVE incluído).

Se o importe dos gastos xustificadas fora inferior ao importe do orzamento total previsto para a realización das actividades que constitúen o obxecto do convenio, e que se recolle na memoria económica que se achega co presente convenio, as achegas das partes convenientes reduciranse proporcionalmente.

Logo da realización da actividade prevista no obxecto do convenio, Afundación entregarlle á Consellería o informe final sobre o desenvolvemento do premio. A consellería, unha vez entregado o dito informe, realizará o libramento da cantidade establecida nesta cláusula, logo da presentación das facturas que xustifiquen os gastos realizados para a consecución desta iniciativa, ordenadas segundo o concepto de gasto a que se atribúen e acompañadas da correspondente certificación dos gastos. Aos efectos desta xustificación, consideraranse os gastos realizados no ano 2016 a partir da data de sinatura do presente convenio e que respondan á natureza da actividade realizada.

Esta cantidade farase efectiva na conta corrente que indique Afundación, da que será titular, achegándoa na xustificación dos gastos segundo o modelo que se xunta como Anexo II.

O prazo para xustificar as iniciativas realizadas coa convocatoria e desenvolvemento do premio remata o 15 de decembro de 2016.

Afundación deberá acreditar estar ao corrente do pagamento das obrigas tributarias, coa Seguridade Social e de non ter pendente de pagamento débedas coa Administración pública da Comunidade Autónoma, así como prestar colaboración nas actuacións de control que lle poidan corresponder á Intervención Xeral da Comunidade Autónoma de Galicia e ao Consello de Contas de Galicia. (Anexo II do convenio)

SEXTA.- DEREITOS SOBRE A INFORMACIÓN E TITULARIDADE DOS RESULTADOS

Os resultados froito deste convenio, tales como dípticos, catálogos, publicacións e demais material obtido, serán de titularidade e uso común da Consellería de Cultura, Educación e



Ordenación Universitaria e de Afundación. Os resultados quedarán para futuras edicións e ambas as dúas partes poderán utilizalos nun futuro indistintamente.

A Consellería resérvase o dereito de publicar os resultados, parciais ou finais, obtidos durante a execución do convenio que, en todo caso, terán carácter público.

Calquera que sexa o medio de difusión, ambas as dúas partes comprométense a facer mención expresa do presente convenio.

En calquera caso Afundación poderá facer uso dos coñecementos adquiridos durante a realización do programa en actividades propias da súa función.

Calquera transformación dos resultados do programa de colaboración conxunta requirirá o consentimento expreso das partes asinantes do convenio.

A Fundación Galicia Obra Social comprométese, pola súa parte, a facer constar en toda a publicidade que xeren estas actividades –tanto impresa como audiovisual- a colaboración Xunta de Galicia, para o que utilizará a normativa da imaxe corporativa da Xunta de Galicia.

A Consellería de Cultura, Educación e Ordenación Universitaria cumprirá coas obrigas específicas de información de convenios de conformidade co disposto no artigo 15 da Lei 1/2016 de 18 de xaneiro, de transparencia e bo goberno.

SÉTIMA.- PARTICIPACIÓN DOS COLABORADORES

O asinamento deste convenio non implica relación laboral, contractual ou de calquera outra índole entre os profesionais que vaian desenvolver as actividades previstas e a Xunta de Galicia, de tal xeito que a esta non se lle poderá esixir responsabilidade ningunha, nin directa, nin subsidiaria, polos actos ou feitos acaecidos no desenvolvemento do convenio.

OITAVA.- MODIFICACIÓN, DENUNCIA E RESCISIÓN DO CONVENIO

As partes poderán denunciar ou modificar o presente convenio en calquera momento por mutuo acordo.

O incumprimento de calquera das obrigas contraídas no presente convenio por unha das partes facultará á outra para rescindilo, quedando automaticamente anulados todos os



dereitos correspondentes sobre o obxecto do programa de colaboración conxunta, pero non así as obrigas contraídas no mesmo.

NOVENA.- VIXENCIA DO CONVENIO

O presente convenio estenderá a súa vixencia dende a súa sinatura e ata o 31 de decembro de 2016.

DÉCIMA.- XURISDICCIÓN

As partes comprométense a resolver de maneira amigable calquera desacordo que poida xurdir no desenvolvemento do presente convenio.

No seu caso, as partes someterán as diverxencias que puideran presentarse en orde á interpretación ou cumprimento do presente convenio á xurisdicción contencioso-administrativa.

E en proba de conformidade de canto antecede, asinan por duplicado o presente documento no lugar e data arriba indicados.

Pola Consellería de Cultura, Educación e
Ordenación Universitaria

Pola Fundación Galicia Obra Social